

Na osnovu člana 2. Zakona o osnovama sigurnosti saobraćaja na cestama u Bosni i Hercegovini ("Službeni glasnik BiH broj: 6/06, 75/06, 44/07, 84/09, 48/10, 18/13, 8/17, 89/17 i 9/18), člana 8. i člana 13. Zakona o principima lokalne samouprave u Federaciji BiH ("Sl. novine FBiH", br.49/06), člana 12. i 21. Zakona o lokalnoj samoupravi Unsko-sanskog kantona ("Službeni glasnik USK-a", br.8/11) člana 58. Zakona o komunalnim djelatnostima ("Službeni glasnik Unsko-sanskog kantona", broj: 4/11, 11/11, 6/12, 13/12 i 14/17) i člana 24. Statuta općine Sanski Most ("Službeni glasnik općine Sanski Most", broj: 4/08, 5/08, 5/09, 2/10, 9/11), Općinsko vijeće općine Sanski Most, na 8. sjednici održanoj dana 23.09.2021. godine, d o n o s i

## **ODLUKU** **o javnim parkiralištima na području općine Sanski Most**

### **OPĆE ODREDBE**

#### **Član 1.**

Ovom Odlukom se definiše upravljanje javnim parkiralištima, utvrđuju uslovi, način korištenja, organizacije i način naplate parkiranja vozila na javnim parkiralištima na području općine Sanski Most.

#### **Član 2.**

(1) Javnim parkiralištima se smatraju javne površine namijenjene isključivo za zaustavljanje i parkiranje vozila određene ovom Odlukom.

(2) Upravljanje javnim parkiralištima, na kojima se naplaćuje parkiranje, vrši davalac komunalne usluge (javno preduzeće komunalnih djelatnosti ili privredno društvo), a na osnovu odluke Općinskog vijeća (u daljem tekstu: Upravitelj).

#### **Član 3.**

(1) Javna parkirališta mogu biti uređena za parkiranje vozila na ulicama i van ulica.

(2) Javna parkirališta van ulica mogu biti otvorena i zatvorena tipa.

(3) Otvorena javna parkirališta su ona parkirališta koja zbog prometne situacije nije moguće fizički zatvoriti preprekama.

(4) Zatvorena parkirališta su parkirališta koja se u cilju kontrole ulaza i izlaza vozila mogu fizički zatvoriti, a da se ne remeti normalan tok saobraćaja.

#### **Član 4.**

(1) Javna parkirališta moraju biti označena saobraćajnom signalizacijom u skladu sa Zakonom o sigurnosti saobraćaja na cestama u Bosni i Hercegovini ("Službeni glasnik BiH broj: 6/06, 75/06, 44/07, 84/09, 48/10, 18/13, 8/17, 89/17 i 9/18) i Odlukom o sigurnosti i regulaciji saobraćaja na području općine Sanski Most.

(2) Javna parkirališta za osobe sa posebnim potrebama se posebno obilježavaju horizontalnom i vertikalnom saobraćajnom signalizacijom.

(3) Uređenje i obilježavanje javnih parkirališta na kojima se naplaćuje parkiranje vrši upravitelj.

#### **Član 5.**

(1) Javna parkirališta na kojima se naplaćuje parkiranje, označena su horizontalnom i vertikalnom signalizacijom, u skladu sa propisima o sigurnosti saobraćaja.

(2) Vertikalna saobraćajna signalizacija (na vidnom mjestu istaknuto obavještenje na saobraćajnim tablama) sadrži:

- a) oznaku „P“ (parkiralište) - skraćeni naziv parkirališta,
- b) broj parking zone,
- c) upozorenje o obaveznoj naplati usluga parkiranja,
- d) cijena usluga javnih parkirališta,
- e) upozorenje da će vozilo parkirana na nedozvoljenim (neobilježenim) mjestima biti blokirana uređajem za blokiranje točkova „liscama“,
- f) kategorija motornih vozila koja se mogu parkirati,
- g) radno vrijeme naplate usluga parkiranja.

(3) Horizontalna saobraćajna signalizacija označava se u skladu sa propisima o sigurnosti saobraćaja.

(4) Korisnik je dužan vozilo parkirati u skladu sa horizontalnom i vertikalnom signalizacijom, odnosno u skladu sa uputama koje mu daje ovlaštena osoba Upravitelja, ako parkiralište nema horizontalnu signalizaciju (ako podloga parkirališta nije asfaltirana ili betonirana).

#### Član 6.

Ulaskom na javno parkiralište na kojem se vrši naplata, vlasnik ili osoba koja upravlja motornim vozilom, prihvata uvjete parkiranja propisane ovom Odlukom.

## II JAVNA PARKIRALIŠTA NA KOJIMA SE NAPLAĆUJE PARKIRANJE NA PODRUČJU OPĆINE SANSKI MOST

#### Član 7.

(1) Javna parkirališta sa naplatom na području općine Sanski Most, kategorizuju se po zoni i vrsti parkiranja na slijedeći način:

Naziv javnog parkirališta	Parking mjesta	Otvoren /zatvoren	zona
P-1 PARKING KOD OPĆINE	63	OTVOREN	I
P-2 PARKING TRG LJILJANA	35	OTVOREN	I
P-3 BOLNICA VAN KRUGA	20	OTVOREN	II
P-4 GRADSKA DVORANA I U ULICI "NASIHE KAPIDŽIĆ- HADŽIĆ"	50 + 10=60	OTVOREN	II
P-5 VAKUFKA PIJACA-ULICA "25.NOVEMBAR" I "HAMZIBEGOVA ULICA"	65	OTVOREN	II
P-6 UL."10.OKTOBAR", "NERONA MEHADŽIĆA" I "ZAVNOBIH-a" (KOD SUDA, CENTRA ZA SOCIJALNI RAD I IGRALIŠTA PARTIZAN)	15+11+20+10+7=63	OTVOREN	I
P-7 PRIJEDORSKA ULICA	25	OTVOREN	I
P-8 PARKING KOD MUPA- ULICA"ALIJE IZETBEGOVIĆA"	20	OTVOREN	II

P-9 AUTOBUSKA STANICA-"BULEVAR VII KORPUSA "	11	OTVOREN	I
P-10 "BULEVAR VII KORPUSA " (KOD BOTANIČKOG VRTA I DJEČIJE IGRAONE)	21	OTVOREN	II

(2) Općinski Načelnik može svojim aktom odrediti nova i izvršiti izmjene postojećih javnih parkirališta u skladu sa Zakonom.

### III USLOVI I NAČIN KORIŠTENJA JAVNIH PARKIRALIŠTA

#### Član 8.

Parkirališta iz člana 7. ove Odluke mogu koristiti sva lica pod istim uslovima propisanim zakonom, odlukama općine Sanski Most i ovom Odlukom.

#### Radno vrijeme javnih parkirališta

#### Član 9.

(1) Na javnim parkiralištima na kojima se naplaćuje parkiranje, radno vrijeme će biti određeno svakim radnim danom i subotom u periodu :

##### I zona

- od 07,00 do 22,00 sata zimski period ( 01.10.-30.04.)
- od 07,00 do 24,00 sati ljetni period (01.05. – 30.09.)

U ostalim parking zonama od 07,00 do 19 ,00 sati.

(2) Izuzetno Upravitelj može zbog objektivnih okolnosti, odrediti i drugačije radno vrijeme koje mora biti istaknuto na javnim parkiralištima na kojima se primjenjuje.

(3) Nedjeljom i praznicima, na javnim parkiralištima se neće vršiti naplata parkiranja.

(4) Izuzetno od odredbi stava (1) ovog člana u "Prijedorskoj ulici" za vrijeme pješačke zone se neće vršiti naplaćivanje parkinga obzirom da se prema Odluci o regulaciji i sigurnosti saobraćaja na području općine Sanski Most zabranjuje saobraćaj u oba smjera.

#### Naplata javnih parkirališta

#### Član 10.

(1) Za korištenje javnog parkirališta Korisnik plaća naknadu prema tarifnim zonama. Odluku o cijenama parking karte donosi Općinsko vijeće općine Sanski Most, na prijedlog Općinskog načelnika u roku od tri mjeseca od dana stupanja na snagu ove Odluke.

(2) Cijena povlaštene karte za fizičke i pravne osobe u ulicama u kojima je uvedena naplata parkiranja iznosi 70% iznosa mjesečne odnosno godišnje karte za navedenu zonu.

(3) Pravo na povlaštenu kartu ima fizička osoba koja:

- a) ima prebivalište ili boravište na području na kojem se obavlja naplata parkiranja, što dokazuje aktom nadležnog organa i,
- b) ima vozilo registrirano na svoje ime što dokazuje valjanim prometnim dokumentom,
- c) koristi poslovni prostor u svrhu obavljanja registrirane djelatnosti na području na kojem se obavlja naplata parkiranja, što dokazuje ugovorom o zakupu ili drugim valjanim dokumentom i,
- d) nema drugu mogućnost za parkiranje vozila osim korištenjem javnog parkirališta.

(4) Pravo na povlaštenu kartu ima pravna osoba koja:

- a) koristi poslovni prostor na području na kojem se obavlja naplata parkiranja, što dokazuje ugovorom o zakupu ili drugim valjanim dokumentom,
- b) ima vozilo registrirano na svoje ime što dokazuje valjanim prometnim dokumentom,
- c) nema drugu mogućnost za parkiranje vozila osim korištenjem javnog parkirališta.

(5) Izdavanje mjesečne, godišnje i povlaštene karte obavezuje Upravitelja da za iste obezbijedi kontinuirano slobodno parking mjesto.

(6) Izuzetno od odredbi stava 2.,3.,4. i 5. ovog izuzima se parking u "Prijedorskoj ulici" na kojem nije moguće izvršiti naplatu mjesečne i godišnje karte, niti ostvariti pravo na povlaštenu kartu.

#### **Član 11.**

(1) Vozilo sa mjesečnom i godišnjom parking kartom može biti vremenski neograničeno parkirano na svim javnim parkiralištima, na kojima se vrši naplata unutar zone za koju je karta izdata i u zonama nižim od te u periodu važenja parking karte.

(2) Mjesečna i godišnja karta moraju biti vidno istaknute na prednjem vjetrobranskom staklu motornog vozila.

#### **Član 12.**

(1) Za naplatu parkiranja na otvorenim javnim parkiralištima se može koristiti parking karta iz automata za naplatu parkiranja (ako su postavljeni na parking), ili naplata - fiskalni račun od strane uposlenika upravitelja, ili uplata putem mobilne telefonije (sms poruka), a na zatvorenim javnim parkiralištima se koristi ulazni printani listić i izlazni printani listić.

(2) Kartu za parkiranje je korisnik dužan istaknuti sa unutrašnje strane prednjeg vjetrobranskog stakla vozila, na način da bude vidljiv serijski broj, te da iz nje ovlaštena osoba Upravitelja za naplatu parkiranja može utvrditi podatke (godina, dan, sat i minuta početka parkiranja).

#### **Član 13.**

Korisnik otvorenog javnog parkirališta unaprijed plaća naknadu za planirano vrijeme parkiranja, a kod zatvorenog javnog parkirališta prilikom napuštanja javnog parkirališta, prema podacima sa ulaznog listića.

#### **Član 14.**

(1) Parking karta je dokaz o uredno plaćenju naknadi za parkiranje na javnom parkiralištu.

(2) Sadržaj i izgled parking karte će biti detaljno određen posebnim aktom Upravitelja.

#### **Član 15.**

Kod naplate putem automata, korisnik javnog parkirališta, količinom ubačenog novca u automatu, određuje dužinu plaćanja parkiranja.

### **Kontrola korištenja javnih parkirališta, blokiranje i deblokiranje vozila**

#### **Kontrolor**

#### **Član 16.**

Pravilnost korištenja javnog parkirališta, kontrolišu ovlaštene osobe Upravitelja, u skladu sa aktima Upravitelja i odredbama ove Odluke.

#### **Član 17.**

(1) Za parkiranje vozila u vlasništvu invalidnih osoba, osigurava se određeni broj parking mjesta.

(2) Pravo korištenja mjesta za parkiranje vozila invalida, ostvaruju invalidne osobe koje posjeduju znak pristupačnosti, odnosno međunarodni znak invalida, a u skladu sa čl. 29. Zakona o sigurnosti saobraćaja na cestama u BiH.

## **Povreda uslova korištenja javnih parkirališta**

### **Član 18.**

Korisnik javnog parkirališta čini povredu odredaba uslova korištenja javnog parkirališta propisanim ovom Odlukom ako:

- a) prekorači dopušteno vrijeme parkiranja,
- b) ne istakne, nepravilno istakne ili istakne neodgovarajuću parking kartu s unutrašnje strane vjetrobranskog stakla,
- c) ne pridržava se horizontalne i vertikalne prometne signalizacije na javnom parkiralištu .

## **Blokiranje nepropisno parkiranog vozila**

### **Član 19.**

(1) U slučajevima povrede odredaba iz čl.18. Stav 1. alineja 1. i 2. Ove Odluke izvršit će se blokiranje vozila uređajem za blokiranje točkova.

(2) Poslove blokiranja i deblokiranja vozila vršit će ovlaštene osobe Upravitelja, uređajem za blokiranje točkova „liscicama“.

(3) Prije početka stavljanja uređaja za blokiranje točkova na vozilo ovlašteno lice:

- a) fotografira vozilo u zoni kotača (blatobran, prednji dio vrata i sl.), kako bi se tačno utvrdilo u kakvom je stanju vozilo bilo prije stavljanja blokade. Fotografiranje se vrši radi sprečavanja eventualnih zahtjeva korisnika usluga za isplatu štete za oštećenja koja su već bila na vozilu
- b) o blokiranju vozila ovlaštena osoba Upravitelja je dužna sačiniti zapisnik, u koji se unose podaci o stanju vozila prije blokade .
- c) kod blokiranja vozila, ovlaštena osoba Upravitelja je dužna, na prednje vjetrobransko staklo ili drugo vidno mjesto, staviti obavjest da je vozilo blokirano sa uputom korisniku o daljnjem postupanju,
- d) obavijest mora da sadrži: pravni osnov blokiranja, datum i vrijeme blokiranja vozila, lokaciju parkirališta (broj parkirališta i adresa), marka vozila, registraska oznaka blokiranog vozila, kontakt telefon, način plaćanja naknade za deblokiranje, pouku o pravnom lijeku i postupak u slučaju ne plaćanja troškova deblokiranja,
- e) nakon blokiranja vozila, obavezno se fotografira blokirani kotač i cjelokupno vozilo sa vidljivom registracijom vozila,
- f) troškove blokiranja i deblokiranja vozila snosi korisnik usluga.

## **Troškovi blokiranja i deblokiranja vozila**

### **Član 20.**

Visinu naknade za blokiranje i deblokiranje vozila utvrđuje Upravitelj.

### **Član 21.**

(1) Po pozivu korisnika usluga čije je vozilo blokirano, ovlaštene osobe upravitelja dužne su izvršiti deblokadu vozila, bez obzira da li je korisnik platio troškove deblokiranja ili ne.

(2) Nakon deblokiranja vozila, isto se fotografira i sačinjava zapisnik o deblokiranju kojeg potpisuje ovlaštena službena osoba upravitelja i korisnik usluga.

(3) Korisniku usluga koji nije državljanin BiH i korisniku usluga sa stranim registarskim oznakama vozilo će se deblokirati nakon plaćanja troškova deblokade na licu mjesta.

## Član 22.

(1) Troškove blokiranja i deblokiranja vozila, snosi vlasnik vozila, odnosno osoba koja upravlja vozilom.

(2) Troškovi deblokiranja mogu se platiti odmah, na licu mjesta, uz uredno izdati račun ovlaštene osobe Upravitelja ili u roku od osam dana, od dana prijema računa na transakcijski račun Upravitelja.

(3) Ukoliko korisnik usluga ne plati troškove deblokiranja u ostavljenom roku, dalji postupak naplate, vrši komunalni inspektor putem prekršajnog postupka u skladu sa Zakonom o prekršajima Federacije BiH („Sl.glasnik Federacije BiH“ broj 63/14.) uz dostavljene dokaze od strane ovlaštene osobe Upravitelja.

## Član 23.

Štete koje nastanu na vozilu prilikom blokiranja i deblokiranja vozila, snosi Upravitelj.

### Vertikalna saobraćajna signalizacija

## Član 24.

Održavanje i uređenje javnih parkirališta vrši Upravitelj i podrazumijeva:

- a) horizontalnu i vertikalnu signalizaciju,
- b) održavanje slivnih rešetaka (poklopaca i šahtova),
- c) uređenje asfaltnih površina (krpanja rupa ili presvlačenje novim slojem asfalta, a makadamski parking prostor redovno održavati nasipanjem odgovarajućim materijalom,
- d) redovno održavanje higijene,
- e) kao i uklanjanje snijega, poledice i drugih elemenata koji ometaju parkiranje.

## Član 25.

(1) Vozila hitne medicinske pomoći, policije, vatrogasna vozila i službena vozila organa uprave ili inspekcije, kada u toku intervencije koriste javno parkiralište ne plaćaju naknadu za parkiranje.

(2) Vozila pravnih osoba koji su izvođači radova na javnim parkiralištima i vozila pravnih lica u ophodnji i održavanju javne infrastrukture: elektro, telekomunikacije, vode, kanalizacije, za vrijeme dok izvode radove, u skladu sa odobrenjem nadležne općinske Službe, izuzeta su od plaćanja naknada za parkiranje.

## Član 26.

Upravitelj na javnim parkiralištima na kojima se naplaćuje parkiranje, ne snosi odgovornost u slučaju otuđenja motornog vozila ili nastanka štete na istom u vremenu dok je parkiran.

## Član 27.

(1) Naplatu parkiranja i kontrolu naplate parkiranja, obavljaće uposlenici upravitelja, koji moraju biti jednoobrazno odjeveni, imati identifikacione legitimacije, na kojima je upisan naziv preduzeća, serijski broj, ime i prezime i fotografija uposlenog lica - radnika koji vrši naplatu.

(2) Općina posebnim aktom bezuslovno može na javnom parkiralištu ili dijelu javnog parkirališta odrediti, odnosno promijeniti namjenu u određenom vremenskom periodu ili trajno u svrhu lociranja taksi stajališta, izgradnje objekata i sl.

## **NADZOR**

### **Član 28.**

- (1) Nadzor nad provođenjem ove Odluke vrši Služba za razvoj, poduzetništvo i resurse.  
(2) U vršenju nadzora općinska Služba koordinira svoju djelatnost sa odgovarajućim organima i pravnim licem registrovanim za upravljanje javnim parkiralištima.

### **Član 29.**

Inspekcijski nadzor nad provođenjem ove Odluke će vršiti nadležna inspekcija općine Sanski Most.

### **Član 30.**

- (1) Prekršajni postupak pokreće i vodi ovlaštena osoba, odnosno nadležna inspekcija općine Sanski Most, izdavanjem prekršajnog naloga ili podnošenjem zahtjeva za pokretanje prekršajnog postupka, na temelju dokaza dostavljenih od strane ovlaštene osobe Upravitelja.  
(2) Za nesavjesno upravljanje i održavanje parking prostorima na području općine Sanski Most prekršajni postupak pokreće i vodi ovlaštena osoba, odnosno nadležna inspekcija općine Sanski Most, izdavanjem prekršajnog naloga ili podnošenjem zahtjeva za pokretanje prekršajnog postupka.

## **KAZNE NE ODREDBE**

### **Član 31.**

- (1) Novčanom kaznom u iznosu od 50 KM do 100 KM, kaznit će se vlasnik motornog vozila za neplaćanje novčane naknade utvrđene u članu 20. Ove Odluke i Odluci o cijenama parking karte.  
(2) Novčanom kaznom u iznosu od 50 KM do 100 KM kaznit će se osoba koja ošteti automat za naplatu parkiranja.  
(3) U slučaju da se ne može utvrditi identitet vozača, kaznit će se vlasnik vozila.

### **Član 32.**

Upravitelj je obavezan, u roku od 30 dana od dana stupanja na snagu Odluke iz člana 2. stav 2. donijeti provedbene akte iz članova 14., 16. i 20. ove Odluke.

### **Član 33.**

Raspodjela dobiti ostvarene od javnih parkirališta, između upravitelja javnih parkirališta i Općine Sanski Most, kao vlasnika javnih parkirališta, definisat će se posebnom odlukom.

### **Član 34.**

Stupanjem na snagu ove Odluke prestaje da važi "Odluka o prenosu poslova: upravljanja, održavanja i pružanja usluga na javnim parkinzima JKP "SANA"d.o.o. Sanski Most" ("Službeni glasnik općine Sanski Most, br.1/10) i "Odlukama o cijenama parking usluga" ("Službeni glasnik općine Sanski Most, br.4/10, 10/11).

### **Član 35.**

Ova Odluka stupa na snagu osmog dana od dana objavljivanja u Službenom glasniku općine Sanski Most.

Broj: 01-02-295/21

Datum: 27.09.2021. godine

Predsjedavajuća Općinskog vijeća

\_\_\_\_\_  
dr. Sanda Čekić, s.r.

Na osnovu člana 2. Zakona o osnovama sigurnosti saobraćaja na cestama u Bosni i Hercegovini ("Službeni glasnik BiH broj: 6/06, 75/06, 44/07, 84/09, 48/10, 18/13, 8/17, 89/17 i 9/18), člana 8. i člana 13. Zakona o principima lokalne samouprave u Federaciji BiH ("Sl. novine FBiH", broj: 49/06 i 51/09), člana 12. i 21. Zakona o lokalnoj samoupravi Unsko-sanskog kantona ("Službeni glasnik Unsko-sanskog kantona", broj: 8/11), člana 58. Zakona o komunalnim djelatnostima ("Službeni glasnik Unsko-sanskog kantona", broj: 4/11, 11/11, 6/12, 13/12 i 14/17) i člana 24. Statuta općine Sanski Most ("Službeni glasnik općine Sanski Most", broj: 4/08, 5/08, 5/09, 2/10, 9/11), Općinsko vijeće općine Sanski Most, na sjednici održanoj dana 28.11.2023. godine, d o n o s i

**ODLUKU**  
o izmjenama i dopunama  
Odluke o javnim parkiralištima na području općine Sanski Most

**Član 1.**

Ovom Odlukom se vrše izmjene i dopune Odluke o javnim parkiralištima na području općine Sanski Most ("Službeni glasnik općine Sanski Most", broj: 09/21) (u daljem tekstu: Odluka u odgovarajućem padežu).

**Član 2.**

Član 7. stav (1) mijenja se i sada glasi:

"(1) Javna parkirališta sa naplatom na području općine Sanski Most, kategorizuju se po vrsti parkiranja na slijedeći način:

Naziv javnog parkirališta	Parking mjesta	Otvoren /zatvoren
P-1 PARKING KOD OPĆINE	63	OTVOREN
P-2 PARKING TRG LJILJANA	35	OTVOREN
P-3 BOLNICA VAN KRUGA	20	OTVOREN
P-4 GRADSKA DVORANA I U ULICI "NASIHE KAPIDŽIĆ-HADŽIĆ"	50+10=60	OTVOREN
P-5 VAKUFСКА PIJACA-ULICA "25.NOVEMBAR" I "HAMZIBEGOVA ULICA" I UL. CIVILNIH ŽRTAVA RATA (KOD TEMPIC ZGRADE)	73+4=77	OTVOREN
P-6 UL."10.OKTOBAR", "NERONA MEHADŽIĆA" I "ZAVNOBIH-a" (KOD SUDA, CENTRA ZA SOCIJALNI RAD I IGRALIŠTA PARTIZAN)	15+11+20+10+7=63	OTVOREN
P-7 PRIJEDORSKA ULICA I UL. IRFANA LJUBIJANKIĆA (PARKING IZA KINA)	25+7=32	OTVOREN
P-8 PARKING KOD MUPA-ULICA"ALIJE IZETBEGOVIĆA"	20	OTVOREN
P-9 AUTOBUSKA STANICA-"BULEVAR VII KORPUSA "	11	OTVOREN
P-10 UL. GOJKA BIJEŁCA STAROG I UL. ISMARA UZEIROVIĆA (KOD ŠUP-A)	20	OTVOREN

### Član 3.

(1) Član 9. stav (1) mijenja se i sada glasi:

“(1) Na javnim parkiralištima na kojima se naplaćuje parkiranje, radno vrijeme će biti određeno svakim danom u periodu:

- od 07,00 do 20,00 sata zimski period (01.10.-30.04.)
- od 07,00 do 24,00 sati ljetni period (01.05. – 30.09.)”

(2) U članu 9. stav (3) se briše. Dosadašnji stav (4) postaje stav (3).

### Član 4.

Član 10. mijenja se i sada glasi:

“(1) Za korištenje javnog parkirališta Korisnik plaća naknadu i to:

- 1h parkinga – 1 KM
- 1 dan parkinga – 5 KM
- 1 mjesec parkinga – 20 KM
- 1 godina parkinga – 200 KM

U cijenu mjesečne i godišnje naknade za parking dodatno se obračunava PDV. ”

### Član 5.

Član 11. stav (1) mijenja se i glasi:

“Vozilo sa mjesečnom i godišnjom parking kartom može biti parkirano na svim javnim parkiralištima.”

### Član 6.

U članu 15. dodaje se stav (2) koji glasi:

“Udaljenost između parking automata ne može biti veća od 150m.”

### Član 7.

Članu 31. mijenja se i glasi:

“(1) Novčanom kaznom u iznosu od 200 KM do 400 KM, kaznit će se vlasnik motornog vozila za neplaćanje novčane kazne utvrđene u članu 20. ove Odluke.

(2) Novčanom kaznom u iznosu od 200 KM do 400 KM kaznit će se osoba koja ošteti automat za naplatu parkiranja i parking rampu.

(3) U slučaju da se ne može utvrditi identitet vozača, kaznit će se vlasnik vozila.”

### Član 8.

Ova Odluka stupa na snagu osmog dana od dana objavljivanja u Službenom glasniku općine Sanski Most.

Broj:01-02-283/23

Datum: 29.11.2023. godina

Predsjedavajuća Općinskog vijeća

\_\_\_\_\_  
dr. Nada Elijaš, s.r.